

vis, transversus, sulco longitudinali medio. Pedes et scapi pilosi. — L. $2\frac{1}{4}$ — $2\frac{2}{3}$ mm.

Insulae Scleo et Tamara.

Cum *C. tarsata* F. Sm. ex Insula Morty plurimis notis convenit, tamen colore diversa; fortasse ipsius varietas. Descriptio SMITHI nimium brevis et incompleta. — Etiam *C. tetracanthae* et *recurvae* EMERY affinis, a priore petioli thoracisque forma diversa, a postrema sutura meso-epinotali impressa agnoscenda.

VI.

Leptomyrmex, Rhizomyrma, Polyrhachis.

86. *Leptomyrmex niger* n. sp. (Tab. VIII. fig. 43.)

Operaria. Fusco-nigra, mandibulis, funiculis et tibiarum apice fusco-testaceis, tarsis pallide-flavis, capite elongato, latitudine sua plus duplo longiore, postice arcuatim attenuato, antennarum gracilium scapo tenuissimo, compresso, petioli humilis, subnodiformis angulo dorsali subrecto, apice rotundato. — L. 8 mm.

Colore et scapo tenui, compresso *L. unicolor* EMERY (ex Queensland) similis, sed capite multo longiore agnoscenda. — In altera specie papuana, *L. fragili* F. Sm. color diversus et caput postice subconice angustatum, petiolus humilior, magis elongatus, scapus subtilior et minus compressus, quapropter *L. nigrum* pro bona specie habendum censeo.

87. *Acropyga* (Rhizomyrma) *oceania* n. sp. (Tab. VIII. fig. 44.)

Operaria. Dilutissime flava, capite rufescente, nitida, pubescens et breviter pilosa, pedibus sine pilis erectis. Caput longius quam latius, lateribus parallelis, postice truncatum, angulis posticis rotundatis, clypeo antice obtusissime biangulato, tertia parte media inter angulos subrecta, laminis frontalibus brevibus, inter se approximatis, oculis punctiformibus ad capitum $\frac{1}{3}$ anteriorem. Mandibulae angustae, margine masticatorio obliquo, acute 4-dentato. Antennae 9 articulatae (nonnunquam 8 articulatae), scapo marginem occipitalem haud attingente, articulo 2-do longiore quam latiore, sequentibus transversis, ultimo magno, elongato, funiculo toto crasso, claviformi. Thorax brevis et altus, promesonoto convexo, postscutello (metanoto) a. mesonoto haud separato, stigmatibus suturæ meta-epinotali proximis. Epinoti pars basalis in declivem curvatim transit. Petiolus squama erecta, parva; gaster elongata. — L. vix ultra 1 mm.

Fœmina. Dilutissime flava, abdomine fuscescente, capite minus diluto, oculis ocellisque nigris. Caput subquadratum, vix latius quam longius, laminis frontalibus ut in ♂, sulco frontali profundo, oculis magnis, laterum capitum tertiam partem occupantibus, clypeo et mandibulis ut in ♂. Antennæ